

ARRÜNA SEGUNDO ÑACONOMOSORRTI SAN PABLO ÜMO BAMA CORINTIOS

1 ¹Arrüñü Pablo apóstol nü isiu nirrancarrti Tuparrü. Arrti Jesucristo itasurutiñü y icüpurutiñü au nanaiñantai nauqui suraboi nurarrti. Auna ichepeñü anatito nauqui usaruqui Timoteo. Supaquionco tanu ümo bama icocoromati Tuparrü au manu pueblurrü Corinto, y ümo namanaiña bama samamecana ümoti au manu cürrü Grecia.

²Taiquiana urria nabaca uiti Tuparrü y uiti Señor Jesucristo. Tari icunusüancanama año.

Nitaquisürücürti Pablo

³Machampiencana ümoti Bae Tuparrü, nauqui Yaütoti Señor Jesucristo, nauqui Uyaü ito. Chiyaupü nipucürürti utacu, y bachebotito upucünuncubu.

⁴Auna icu na cürrü tarucu nutaquisürücü, pero arrti Tuparrü nauqui Uyaü bacheboti upucünuncubu y bayuraratito oemo. Sane nauqui puerurrü bache ipucünuncubu bama taquisürü ito, tacana arrüna yayuracarrti Tuparrü oemo.

⁵Auna icu na cürrü utaquisürüca isiatai tacana nitaquisürücürti Cristo tücañe.

Pero torrio ito upucünuncubu uiti. ⁶Sane nauquiche suichaquisürüca, nauqui ane aupucünuncubu, y nauquito autaesübu eanaqui nausuchequi. Arrüna torrio suipucünuncubu es nauqui arrañö ito ane aupucünuncubu, y nauqui puerurrü año avantabo ñome arrüna nautaqisürücü tacana arrüna suichaquisürücü. ⁷Somoncatü nurria aume, itopiqui tusio suiñemo que ta autaqisürüca tacana arrisomü y tacane torrio ito aupucünuncubu tacana arrüna torrio suiñemo.

⁸Irranca nauqui atusi nurria aume, masaruquitaqui, arrümanu suichaquisürücü au manu provinciarrü Asia. Taha tarucu suichaquisürücü ui macrirrtianuca, tüsaipü chavantabopü somü. Au nitacürurrü supaquionco tiene que suison taha. ⁹Somonquisio tacanati nauqui turabomati isucarü

mayüriabuca, tiene que acontí. ¿Causane pasabo suiñemo arrüina sane? Itopiqui arrti Tuparrü manunecanati suiñemo, tapü somoncatü suiñemoantoe, ta ümotiatai. Arrti te naqui uiche puerurrü asüorimia tato bama coiño. ¹⁰Ta arrti bayurarati suiñemo nauqui tapü suissonca. Somoncatü nurria ümoti, itopiqui tusio suiñemo que ñana ito bayurarati suiñemo. ¹¹Arraño ito apayuraca suiñemo, itopiqui naneneca napeanca ümoti Tuparrü suichacu. Sane nauquiche caüma aboma sürümanama bama machampiencanama ümoti Tuparrü, itopiqui inñumutati arrüina ñanquiquirrimia pünanaquiti suichacu.

¿Causane chüsürotitüpu Pablo conto au Corinto?

¹²Arrüñü Pablo bien ipucünunca, itopiqui tusio iñemo que urria nisüboriqui icu na cürri, y nauquiche ito anancañü abarrüpecu. Champü quiatarrü niñapensaca, chirrapancapü. Iñata sane nisüboriqui, itopiqui arrti Tuparrü bien buenurrti saübuñü, bayurarati iñemo. Arrüina nirravanauncu champürtrü sauquiñüantoe, ta uiti. Chirranitacapü icuqui nantai cürri. ¹³Arrüina nirraconomoso aume, puerurrü lehebo año y sane puerurrü ito aye aboi. Isiatai nisura aume tacana auqui maübo. Ñoncatü aume na atusi aume que ñemanauntu arrüina sane nisura. Aboma te bama abarrüpecu chauqui tütusio ümoma. ¹⁴Sane caüma arrtü cuati tato Señor Jesucristo, aupucünunca isuatañü, tacana arrüina nipucünuncu aucuata.

¹⁵Ñoncatü aume, que ta urria napaquionco saübuñü. Sane nauquiche ñapensacapü yapasearaño torrü veserrü nauqui puerurrü iquia ñacunusüancacarri Tuparrü aubesa. ¹⁶Primero irrancapü yapasearaño, y auqui irrancapü yerotü au Macedonia. Auqui taha irrancia yasüciübü tato aubesa. Sane nauqui puerurrü apayura iñemo ümo niyesa viajerrü au Judea. Pero chiyebopü iñemo arrüina sane niñapensaca. ¹⁷Auqui caüma amucanaño iñemo sane: “¿Causanempü acampiane napensaca?” Bueno, ¿taqui chiñapensatiopü nurria arrüina nirrantomö? Abu tusiatai iñemo. ¿O taqui yaca tacana bama namatü “irrancia”, pero au nitusirrima namatü “chirrancapü”? No, arrüñü champürtrü sane niyaca. ¹⁸Arrti Tuparrü tusio ümoti que arrüñü ane tamantai niñapensaca aupu. ¹⁹Arrti Timoteo, arrti Silvano y arrüñü suburapoi abarrüpecu nürirrti Jesucristo, naqui Aütorrti Tuparrü. Arrti champürtrü tacana bama namatü “irrancia”, abu au nitusirrimia namatü “chirrancapü”. Arrti champürtrü sane nacarrti. Más bien nanti oemo: “Irrancia te rrayura aume”. ²⁰Itopiqui uitito cocono nanaiña nurarri Tuparrü tücañe. Sane nauquiche uiñanauncati Tuparrü auqui nacarrti Jesucristo, naqui uiche cocono nanaiña. ²¹Uiti Tuparrü sopicococati Cristo, y arraño ito apicococati. Uiti usamamecaca ümoti. ²²Sane caüma usaca tacanarrtü iñatati sellorrü oemo, na atusi que ta pertenecebo oñü ümoti. Icüpurutiti Espíritu Santo au nuyausasü, tacana macumanatarrü oemo, na atusi que ta rranrrti acumanatiqui manrrü ñana oemo.

²³Suraboira ausucarü arrüina itopiquiche chiyacapütü tanu aubesa au Corinto, tacana arrümaniompi niñapensaca aucutanu. Arrti Tuparrü anati

tacana niyesa terrticurrü. Tari carrticaboñü uiti, arrtü chüñemanauntupü arrüna sucanañü: Arrüna chiyacapü tanu au Corinto, ta autopiqui, tapü ausucheca arrtü ane carrticurrü aume sobi. Mejor urria tato primero numaquionco oemoantoe. ²⁴Chirrancapü suraboi ausucarü arrüna apisamutomoebo tacanati patrón. Arraño chauqui tapacoconaunca nurria ümoti Señor. Pero irranca rrayura aume nauqui ane manrrü aupucünuncubu.

2 ¹Sane nauquiche chiyacapü tanu yapasearaño, nauqui tapü usucheca tatito uirri. ²Arrtü ausucheca sobi, ¿ñacutipü naqui puerurrü aipucünuncunutiñü? Arrañoantai puerurrü. ³Sane nauquiche icüputa aucutanu arrümanu nirraconomoso, nauqui atusi aume, que ta chiyecapü tanu. Itopiqui chirrancapü yero tanu aubesa nauqui isuche aboi abu ñoncapütü aume, nauqui apipucünuncunuñü. Pero tusiatai iñemo que ipucünuncatai aboi, ñana ui napacoconauncu ümo nisura arrtü yaca anchepe, tacane ito arraño aupucünunca ito saübuñü. ⁴Iconomota icu manu quichonomiacarrü aume aübu tarucu nisuchequi y nirraquionco abapa, hasta isareoca. Pero champürrtü rraconomoca nauqui ausuche, ta nauqui atusi aume arrüna tarucu naucua iñemo.

Artri maniqui ane nomünantü uiti rrimiacana tato ümoti

⁵Uiti maniqui taman ñoñünrrü ameanauqui ane arrüna suchequirri. Champürrtü iñemoantai, ta iñatai aume ito, o sea ümo bama mümanama ameanauqui. Itopiqui chirrancapü surabotiapae maniqui, ni aumepito. ⁶Chauqui tücarrticaboti ui bama süürümanama abarrüpecuqui. Chauqui tiñatai. Asioti saneantai. ⁷Caüma tiene que apirrimiacata tato aübuti arrüna nomünantü uiti. Apipucünuncusurrti, tapü tarucapae ñana nisuchequirrti. Rrepente ubatapae ümoti. ⁸Aburasoi isucarüti arrüna nicuartri aume, pero tari ñemanauntu nicuartri aume. ⁹Rraconomoca tanu aume aucutanu, itopiqui irranca atusi iñemo, arrtü ñemanauntu apicocota nisura, y arrtü puerurrü rroncatü aume. ¹⁰Arrtü apirrimiacata nomünantü aübuti maniqui ñoñünrrü, arrüñü ito tiene que irrimiacata nomünantü uiti. Arrtü ane isane nünantü uiti iñemo, irrimiacata tato auqui nabaca isucarüti Cristo, ¹¹nauqui tapü encañaoti choborese oemo, itopiqui chauqui tütusio oemo arrüna churriampü nisonirrti.

Anati Pablo au Troas

¹²Iñatai aucutanu au Troas, nauqui suraboi arrüna urria manitacarrü. Acamanu chebo iñemo uiti Señor, nauqui suraboi arrüba omirria manitacaca icütüpüti. ¹³Pero como chütäbücotipü sobi Tito acamanu, nauqui usaruqui, champürrtü urria niyaca taha. Auqui ñasamu nariorrrü ümo manuma pohoso, nauqui yerotito au manu cürrü Macedonia yapacheriuruti.

Numacanaca ichepeti Cristo

¹⁴ ¡Chapie ñmoti Tuparrü! Itopiqui uiti macananati Cristo ñmoti choborese. Arrüsomü supacanaca ito ichepeti Cristo. Sane nauquiche caüma arrti Cristo icüpuruti somü au nanaiñantai icu na cürri. Soboi caüma bama macrirrtianuca isuputaramati Cristo. ¹⁵ Arrüna supanitaca tacana arrone rrioriocomä, arrüna urriantai norimia, arrüna ñacumanatarrti Cristo ñmoti Tuparrü. Arrüna norimia sürotü esa bama sürobotü au napese y esa bama ito sürobotü au infierno. ¹⁶ Ñmo bama sürobotü au infierno ane supanitaca tacana arrone ñnantatai norirri arrüna uiche coiñoma macrirrtianuca. Tapü ñmo bama sürobotü au napese ane arrüna supanitaca tacana arrone urriantai norimia, arrüna uiche asüborimia macrirrtianuca. ¿Y ñacutipü naqui puerurrü aisamunenti arrüna trabacorrü ñmoti Tuparrü? Abu torrio süñemo te arrüna trabacorrü. ¹⁷ Aboma bama urapويمia nurarrti Tuparrü, itopiqui ñaquiöncorrüma que macananama monirri itobo. Tapü arrüsomü ane yacüpurrti Tuparrü süñemo, nauqui supaserebi ñmoti Cristo. Suburapoi nurarrti arrüna ñëmanäuncurratöe. Champü quiatarrü supapensaca.

Arrüna nuevurrü tratorrü uiti Tuparrü usaübu

3 ¹ Repente apanitaca ñëmo sane: “Arrti Pablo manitanati tatito urria itacutiatöe”. Abu champürrü sane. Champü nümoche sobi arrüba quichonimiacaca corobo icu que urria nisüboriqui, nauqui apasuriuruñü. Aboma bama ane uimia sane quichonimiacaca, pero arrüñü champü nümoche sobi. ² Arraño abaca tacana manu quichonimiacarrü arrüna uiche atusi arrtü urria nrratrabacaca abarrüpecu. Bien tusio ñëmo. Namanaiña macrirrtianuca puerurrü leheboma arrüna nicororrü. Sane caüma puerurrü atusi ñmoma arrtü urria nisüboriqui. ³ Arraño abaca tacana taman cartarrü corobo sobi ui yacüpurrti Cristo. Pero champürrtü corobo ui tintarrü, ta uiti Espüritu Santo, naqui cuati esaquiti Tuparrü, naqui süborico. Y arrüna cartarrü champürrtü corobo icu canrrü tacana tücañe uiti Tuparrü corobo nüriacarrü. Ane corobo au nausasü macrirrtianuca.

⁴ Sucanañü arrüna sane, itopiqui tusio nurria ñëmo, que arrti Cristo bayurarati ñëmo, y arrtito Tuparrü, numo rratrabacaca ameana. ⁵ Arrüsomü champü isane subaca nauqui sopisamune arrüna trabacorrü soboiyapatöe. Nanaiña arrüna sopiamute torrio süñemo uiti Tuparrü. ⁶ Arrti itorrimiatati süsüriacabo, nauqui suburaboi arrüna nuevurrü tratorrü uiti Tuparrü aübu macrirrtianuca. Au manu primer tratorrü itorrimiatati oemo manu nüriacarrü corobo. Tapü ui arrüna nuevurrü tratorrü basuquiucati Espüritu Santo esaquiti. Tapü ui manu nüriacarrü corobo, ta oconca ñana. Pero uiti Espüritu Santo ta osüboriquia ñmo para siemprrü.

⁷ Arrümanu nüriacarrü torrio tücañe ñmoti Moisés uiti Tuparrü, corobo icu canrrü. Nauquiche torrio ñmoti, tusio nanentacarrti Tuparrü isuti Moisés. Arrümanu nanentacarrü isuti masamuña aenso tatito, nauquiche ññataiti tato

esa genterri oniqui manu yiriturri. Pero ta cuaraiqui nurria. Sane nauquiche chüpuerurripü asaramatü isuti bama israelitarri. Arrümanu nüriacarrü cuatü aübu tarucu nanentacarrü, abu ui manu nüriacarrü oconca ñana. ⁸Pero manrri coñorrtai caüma arrüna nenentacarrü Tuparrü oemo, itopiqui baserebiquia ümoti uiti Espiritu Santo, y champürrtü ui nüriacarrü. ⁹Ui nüriacarrü tusio nanentacarrü Tuparrü tücañe, pero uirrito cuatü carrticurri oemo. Arrümanu nüriacarrü champü tacanache nacarrü, bien coñorrtai. Pero manrri coñorrtai arrüna manunecatarrü caüma oemo, arrüna uiche urria nusaca au narrtarrü Tuparrü. ¹⁰Arrümanu nüriacarrü tücañe chiyaupü nanentacarrü, pero caüma champürrtü sanenqui, itopiqui manrri chiyaupü nanentacarrü ui na nuevurri tratorri uiti Tuparrü usaübu. ¹¹Arrümanu primer nesarrü tratorri Tuparrü coñorrtai, panaca caüma chüvaleoiquipü. Arrüna nuevurri nesarrü tratorri Tuparrü usaübu caüma champü nitacürurri, champü tacanache nicoñoporri.

¹²Nanaiña arrüna sane tusio nurria suiñemo. Sane nauquiche supanitaca aübu narucurri suiñemo. ¹³Champürrtü sopisamute tacanati Moisés tücañe. Itopiqui arrü irrümurriancanatüyü nisurri, nauqui tapü arrtaimia macirrtianuca que tirranrri aenso manu nanentacarrü isuti. ¹⁴Champürrtü nisurrtiatü Moisés arrüna rruburrio. Canapae nausasürüma bama israelitarri burruburrio ito o sea chentienderrüpüma nurarrü Tuparrü. Y sane caümainqui chüpuerurripü aye uimia, arrtü leheboma arrüna Antiguo Testamento. Canapaepü aninqui rruburrio nausasürüma. Pero arrübama icocoromati Cristo tonema bama iyebo uimia nurarrü Tuparrü. ¹⁵Sane te caümainqui rruburrioiqui ñapensacarrüma bama israelitarri, chentienderrüpüma, arrtü leheboma manu liburrü nesa nüriacarrü uiti Moisés. ¹⁶Pero arrü naqui icocorotiti Señor, carübu manu nicüburri nausasürri. Auqui caüma entienderrü nurria.

¹⁷Arri Señor tonenti naqui uiche icüpurutiti Espiritu Santo au nuyausasü, y uiti utaesübuca ñünana manu nüriacarrü, sane nauqui urria nusaca caüma. ¹⁸Así que usaca tacanarrtü chürruburriopü nusu, tacanarrtü cuara nanentacarrü Tuparrü usu. Ui arrüna sane masamuña campiabo nusaca tacana nacarrü, y tusio ito au nosüboriqui arrüna nanentacarrü Tuparrü. Nanaiña arrüna sane pasabo uiti Espiritu Santo, naqui esaquiti Cristo.

Champü uiche puerurri vanurru oñü

4 ¹Arri Tuparrü bien buenurri suisaübu. Torrio suiñemo uiti arrüna trabacorrü. Sane nauquiche arucu suiñemo. ²Champürrtü sopisamute anecanatai arrüna churriampü, champürrtü supatachemacaca ui supanitaca. Suburapoi nurria nurarrü Tuparrü, bien besüro. Champürrtü campiabo soboi. Suburapoi arrüna ñemanauncurratoe. Namanaiña bama isuputarama somü tusio ümoma arrüna sane, y arrtito Tuparrü tusio ito ümoti.

³Pero arrübama sürobotü au infierno, tonema bama chiyebopü uimia arrüna urria manitacarrü soboi. ⁴Arrüma chicocotapüma. Sane nauquiche nacarrüma tacana rruburrio nausasürüma, y churriampü ñapensacarrüma

uiti choborese, naqui ane nüriacarrti auna icu na cürri. Uiti nauquiche chentienderrüpa. Arrüna manitacarrü sobi bien urria, ichepecata tacana basarurrü. Uirri caüma usupUtacati Cristo, y uiti Cristo usuputacati Tuparrü. ⁵Champürtrü suburapoi suisüriatöe, ta nürirrti Jesucristo, naqui Señor. Arrüsomü subaca supaserebiquia tacana mosorrü somü aume auqui nacarrti Cristo. ⁶Artri Tuparrü bacüpuruti tücañe sane: “Tari isamunü basarurrü eana tomiquianene”. Tonenti naqui uiche ane basarurrü au subausasi, uiti tusio suiñemo. Soboi caüma tusio ümo macirrtianuca que artri Cristo anati tacanati Tuparrü. Champü tacanache nanentacarrü esati.

⁷Sopichepecaca somü tacana arrone siucurrü. Tapü arrüna urriampae manitacarrü es tacana arrüna tarucu nicuarrü ane ahüburu au siucurrü. Sane nauquiche caüma tusiatai que arrüna tarucu nosüriaca y suisüsü torrio uiti Tuparrü, champürtrü soboiyapatoe. ⁸Au nanaiñantai suichaquisürüca, pero champürtrü ubata suiñemo. Ane tarucu penarrü soboi, pero champürtrü tarucapae suisuchequi. ⁹Aboma suisü bama tüboricatai suiñemo, y itaquisünüancanama somü. Pero artri Tuparrü chiñoconotipü somü. Iyaruraüburuma somü acü, pero chüsuisoncapü, supatücai tatito. ¹⁰Nantarrtai suichaquisürüca tacana nitaquisürücürri Jesús tücañe, numo coiñoti. Tüsaipü suison. Pero uirri tusio ito nurria nicüsürrti Cristo au suisüboriqui. ¹¹Nantarrtai tüsaipü suison auqui nacarrti Cristo, pero uirri manrrü tusio nicüsürrti aübu arrüna cürri suisütüpü. ¹²Sane te tüsaipü suisonca, pero uirri torrio aume ausüboriquibo uiti Tuparrü.

¹³Ane corobo sane nurarrti David tücañe: “Icococati Tuparrü, sane nauquiche rranitaca”. Sane ito arrüsomü sopicococati Tuparrü, y suburapoi ito nurarrti. ¹⁴Artri Tuparrü isümoniancanatito tato Jesús eanaqui macoiñoca. Tusio nurria iñemo que isümoniancanati oñü ito ñana tato. Sane nauqui aye soboi y aboi ito taha au napese esati. ¹⁵Nanaiña arrüna suichaquisürücü es autacu. Tiene que atusi au nanaiña que artri Tuparrü bien buenurrti usaübu. Sane caüma aboma sürümanama bama machampienanama ümoti y uirri ane manauncurrü ümoti.

Ane opobo au napese

¹⁶Sane nauquiche chüsuichücapü somü ümo suisuchequi, itopiui tusio suiñemo osüboriquia tato ñana. Arrüna cürri suisütüpü tirranrrü acon. Pero nuyausüpü artri Tuparrü bacheboti icüsübu naneneca manrrü. ¹⁷Arrüna suichaquisürücü auna icu na cürri champürtrü tarucapae. Pasao ñana. Pero uirri torrio ñana suiñemo yarusürürrü suipucünuncubu, champü tacanache, chütacürusupü. ¹⁸Champürtrü somoncatü ümo arrüna sumarrtai caüma, ta ümo arrüna chüsumarrtaipü. Itopiqui arrüna sumarrtai urria baeta ümo un rratortai. Tapü arrüna chüsumarrtaipü, arrüna uiti Tuparrü, ta ururau ümo para siemperrü.

5 ¹Ichepecata arrüna nocütüpü tacana taman porrü. Arrüna porrü tiene que aiñarri y torrio oemo quiatarrü opobo au napese uiti Tuparrü. O sea auna icu na cürri tiene que ocon aübu na cürri nocütüpü. Pero au

napese tiene que atorri oemo quiatarrü ocütüpübo. Arrümanu nocütüpü au napese urriante uirrtiatoe Tuparrü. Chüpuerurrüpi acon tato. ²Icu na cürrü usucheca. Tarucu nurrianca oerotü au napese au manu nuevurrü nopo. ³Itopiqui tiene que atorri oemo nuevurrü ocütüpübo au napese, tapü usaca tacanarrtü ocüsuaca esati Tuparrü. ⁴Auna icu na cürrü usucheca y uirruca ito. Churriancapü ocon aübu na cürrü nocütüpü. Urrianca nauqui atorri oemo manu nuevurrü ocütüpübo mientras osüboriquiaiqui. Sane nurrianca, nauqui taburriatai na cürrü nocütüpü ui na nuevurrü nocütüpü, arrüna urria ümo para siemprerrü. ⁵Umo isamunuti oñü Tuparrü. Icüpurutiti Espíritu Santo au nuyausasü, nauqui atusi nurria oemo que arrüna sane tiene que acoco ñana.

⁶Sane nauquiche suipucünuncatai. Itopiqui tusio suiñemo, mientras aninqui arrüna cürrü suisütüpü subaca iché auqui nopo au napese, iché pünanaquiti Señor. ⁷Caüma chüpuerurrüpi sumasarati Señor, solamenterrü puerurrü sopicocoroti. ⁸Somoncatü nurria ümoti Tuparrü. Chüsuirrucapü ñünana concorrü, itopiqui manrrü urria suiñemo sopiñocho arrüna cürrü suisütüpü, nauqui somenotü taha ichepeti Señor, au manu nuevurrü suipobo. ⁹Pero manrrü suirranca nauqui puerurrü sopisamune arrüna urria ümoti Tuparrü. Champü nümoche soboi arrtü subacaiqui auna icu na cürrü, o arrtü tsubaca taha au napese esati. ¹⁰Itopiqui nanaiña oñü tiene que uitusiancana oñü isucarüti Cristo, arrtü bacurrtarati. Auqui caüma torrio ümo cadati taman nicuarri uiti Tuparrü. Torrio isiu arrüna uisamute au nosüboriqui auna icu na cürrü.

Urria nusaca aübuti Tuparrü uiti Cristo

¹¹Sane caüma chütacürusupü supaquionco iyo yacurrtacarri Tuparrü ñana. Sane nauquiche sopiñata nurria nauqui aboma bama icocoromati Jesús soboi. Arrti Tuparrü isuputarati somü nurria. Tusio ümoti que urria supapensaca. Urria arrtü tusio ito aume. ¹²Ui arrüna sane subura chüsuirrancapü supanita tatito suichacuapatoe. Pero suirranca te suburaboi ausucarü arrüna uiche puerurrü aupucünu suisaübu. Uirri caüma puerurrü apiñumu nura bama tarucu nivianucurrüma aübu ñanitacarrüma y aübu nanaiña arrüna amarrtai apüma, abu champü nümoche uimia arrtü urria nacarrüma au narrtarri Tuparrü. ¹³¿Taqui locorrü somü au napaquionco? Bueno, arrtü sane, pero ta auqui nacarrü Tuparrü. ¿Taqui urria supapensaca? Bueno, arrtü sane, ta nauqui suburaboi ausucarü arrüba omirria. ¹⁴Sopisamute nanaiña ui supaserebiqui ümoti Tuparrü ui supaquionco iyo manu tarucu nucua ümoti Cristo. Itopiqui sane supapensaca: “Artri maniqui taman coiñoti itobo namanaiña macirrtianuca icu na cürrü. Sane nauquiche namanaiña oñü usaca tacanarrtü toconca ichepeti Cristo au narrtarri Tuparrü”. ¹⁵Coiñoti Cristo itacu nanaiña oñü. Pero ta süboricoti tato eanaqui macoiñocho. Sane caüma tiene que osübori ümoti, champürrtü oemoantoe.

¹⁶Sane nauquiche auqui caüma chüsupapensacaiquipü iyo macirrtianuca isiu nacarrüma icuqui na cürrü. Nauquiche sopisuputacati Cristo auna icu na cürrü tacanati ñoñünrrü nacarrü. Pero caüma campiabo supapensaca

icütüpüiti. ¹⁷Sane caüma arrti naqui icocorotiti, chauqui nuevurrü tato nanaiña nacarrti. Arrümanu nisüboriquirrti tücañe chauqui tütacürusu. Chauqui tanati au nuevurrü nisüboriquirrti. ¹⁸Nanaiña arrüna sane es nisamucurrü Tuparrü. Uiti aicüpuruti somü nauqui suburaboi au nanaiñantai arrüna urria manitacarrü. Uiti Cristo urria caüma ñaquioncorrti Tuparrü oemo, abu tücañe usaca tacana nesarri enemigorrtü. ¹⁹Tone arrüna urria manitacarrü soboi: Arrti Tuparrü icüpurutiti Cristo nauqui airrimiacati tato nomünantü ui bama macirrtianuca icu na cürrü. Tacürusu ñaquioncorrti iyo arrüna nuipünate. Sane nauquiche chauqui tamigorrtü oñü aübuti.

²⁰Sane nauquiche arrti Tuparrü nanti subuturuqui ümo namanaiña macirrtianuca sane: “Au nürirrti Cristo, apasusiu arrüna marrimiacatarrü. Apichüsaño nauqui campiabo nausüboriqui uiti Tuparrü, nauqui amigorrtü año aübuti caüma”. ²¹Arrti Cristo champü isane nomünantü uiti. Pero arrti carrticaboti itobo nanaiña arrüba nomünantü osoi. Sane nauqui urria nusaca au narrtarrti Tuparrü.

6 ¹Arrüsomü supanitaca aume tacana bama imostorrti Tuparrü au na trabacorrü. Arraño tapasutiu ñacunusüancacarrti Tuparrü. Supanquiquia amopünanaqui nauqui apiña nurria, nauqui urria nausüboriqui, tapü ümonatai arrüna ñacunusüancacarrti aume. ²Arrti nanti sane:

Ñoncoi napeanca au manu nanenese nesa macunusüancacarrü.

Rrayuraca aume au manu nanenese arrüna anche itaesümunucama macirrtianuca.

Amasasai nurria, masaruquitaquí, itopiqui caüma usaca au na nanenese nesa macunusüancacarrü. Tone arrüna nanenese anche ataesübuma macirrtianuca eanaqui nomünantü uiti Tuparrü.

Taquisürüma bama apostolerrü itopiqui na urria manitacarrü

³Champü causane suisüboriqui isucarü genterrü, nauqui tapü ünantü ümoma subaca, sane tapü anati naqui manitana churriampü suiñemo y ümo arrüna trabacorrü torrio suiñemo uiti Tuparrü. ⁴Ui arrüna sane urria suisüboriqui, tusio que supaserebiquia ümoti. Supasamuca tairri ñome aruqui nanaiñantai suichaquisürücü. ⁵Bacheboma suichacu. Iñanama somü au reso. Tüborico genterrü suiñemo, arrüchopüratai uimia. Champü supacansaca ui supatrabacaca y champü sumutuburibo. ⁶Tusio nurria supaserebiqui ümoti Tuparrü ui arrüna urria suisüboriqui y ui arrüna tusio suiñemo arrüna ñemanauntu, y ui arrüna supasamunca aübu genterrü y buenurrü somü aübuma. Tusio supaserebiqui ümoti, itopiqui anati Espíritu Santo au subausasü, y itopiqui cuasürüma ñemanauncurratoe suiñemo macirrtianuca. ⁷Subarapoi tanu arrüna ñemanauncurratoe nurarrti Tuparrü. Arrti bacheboti suisüsübu. Subaca tacanati taman sortaborrü, naqui bahiyo y ocümanati itacutiatoe, itopiqui urria suisüboriqui. ⁸Ane nauche ane manauncurrü suiñemo. Ane ito nauche

unuma somü. Aboma bama churriampatai nurarrüma suiñemo. Aboma ito bama urria ñanitacarrüma. Aboma bama namatü ñapanrrü somü, abu arrüna subura ta ñemanauntu. ⁹Champü isane subaca icu na cürri, pero namanaiña macirrtianuca isuputarama somü. Namatü que subaca suissonca, abu suisüboriquiaiqui. Bacheboma carrticurrü suiñemo, pero chiüsuisoncapü uirri. ¹⁰Iñatama suisuchequibo, pero nantarrai suipucünunca. Poberrü somü, pero soboi rricurrüma bama sürümanama. Champü isane suiñemo icu na cürri, pero suipucünuncatai tacanarrtü torrio suiñemo nanaiña arrüna ane icu na cürri.

¹¹Bueno bama masaruquitaïqui, chauqui tüsupanitaca besüro nurria ausucarü. Suburapoi nanaiña supapensaca au suçhüsi ausucarü. ¹²Champürtrü sopiñococaño. Acuasürüca suiñemo. Pero arraño canpae champü suisuasürücüiqui aume. ¹³Rranitaca aume tanaca ümo bama propiorrü isaütaïqui. Apasüsü aübu urria arrüna sucanañü aume, sane nauqui suisuasürü aume.

Usaca tacana ipoboti Tuparrü

¹⁴Tapü amecatü isiu bama chicocoromatipü Jesús, itopiqui churriampü arrüna sane. ¿Aensapü puerurrü uiña arrüna urria chepe arrüna churriampü? No, chüpuerurrüpü. Tacana ito chüpuerurrüpü uiña basarurrü ichepe tomiquianene. ¹⁵¿Aensapü puerurrü chepatai ñapensacarrti choborese tacana ñapensacarrti Cristo? No, chüpuerurrüpü. Isiatai arrti naqui icocorotiti Cristo chüpuerurrüpü aiñanti nisüboriquirrti aübuti naqui chicocorotitipü. ¹⁶¿Aensapü urria nubaca santuca au niporrti Tuparrü, arrüba ituparrüma bama chisuputaramatipü Tuparrü? Abu churriampü. Itopiqui enterurroñü usaca tacana niporrti Tuparrü. Arrti nanti sane:

Irranca rravivi eana macirrtianuca.

Arrüpecuma caüma yasiquia.

Arrüñü caüma Ituparrüma, y arrüma caüma niyesa genterri.

¹⁷Sane nauquiche nantito Señor:

Apaquicho, amecosi eanaqui bama chicocoropümañü, apiñasaño peese pünanaquimia.

Tapü abasiquia ichepe bama ane nomünantü uimia.

Auqui caüma puerurrü yasuriuraño.

¹⁸Arrüñü caüma Aubañü, y arraño isaütaïqui y nichaquiumucutaïqui.

Sane nanti Señor, naqui tarucu nicusüurrti.

7 ¹Masaruquitaïqui, tone arrüna coñorrtai nurarrti Tuparrü oemo. Sane nauquiche uiñana oñü peese pünanaqui nomünantü, tapü uisamute isiu nirranca arrüna cürri nocütüpü, ni aübüpü nuyausüpü.

Pucünuñati Pablo

²Apasamu nurria suiñemo, apasüsü subura. Apasüsü somü au napaquionco. Champüti ameanauqui naqui ane causane soboi ümoti. Champüti naqui taquisürü soboi. Champüti naqui sopencañaca ümoti. ³Champürtrü sucanañü

arrüna sane nauqui suraboi napipüinate; chauqui tüsurapoi ausucarü arrüna naucua iñemo. Aucuasirtica iñemo, champü nümoche arrtü osüboriquia icu na cürrü, o arrtü toconca. ⁴Ñoncatü nurria aume. Ipuçünuncatai aucuata. Champü nümoche sobi arrüna nichaquisürücü. Arucu nurria iñemo, ipuçünunca nurria.


⁵Numo sopiñatai au Macedonia, champü supacansaca. Ane aruqui nanaiñantai suichaquisürücü, y tarucu penarrü soboi. ⁶Pero arrti Bae Tuparrü bayurarati ümo bama taquisürü y ümo bama suchebo. Sane pasabo suiñemo. Numo iñataiti Tito sobesa, arucu tato suiñemo. ⁷Manrrü arucu suiñemo ui manu ñanitacarri. Urapoiti suisucarü que pucünüñati nurria aucuata y que tarucu naurrianca amasara somü tato. Nanti que ausucheca nurria itopiqui arrüna nünantü aucutanu iñemo, y que urrian tato napaquionco iñemo. Uirri caüma manrrü nipuçünuncu.

⁸Ui arrümanu nirraconomoso tanu aume aucutanu ausucheca. Pero canapae urriantai icüputa aume. Orronene iñemo, itopiqui uirri ausucheca au manio naneneca. ⁹Pero caüma ipuçünunca, itopiqui ui manu nirraconomoso campiabo napapensaca y nausüboriqui. Arrümanu naca nausuchequi urriantai ümoti Tuparrü. Sane nauquiche amarrai que champü causane soboi aume. ¹⁰Itopiqui arrtü usucheca isiu nirrancarri Tuparrü y uiñorroncoca oñü, uirri caüma utaesübuca eanaqui nomünantü. Tapü ünantü oemo arrüna sane. Itopiqui arrtü usucheca iyo ba chomirriampü tacana bama icuqui nantai cürrü, ensoro oñopünanaqui nosüboriqui aübuti Tuparrü au napese. ¹¹Pero arraño ausucheca isiu nirrancarri Tuparrü ui manu nirraconomoso aume aucutanu. Uirri urriampae nausüboriqui caüma. Sane nauquiche caüma aurrianca apisamune arrüna urria. Caüma apitusiancata que champü napipüinate. Churriampü aume arrümanu nomünantü. Aupirruca ñünana carrticurü. Tarucu naurrianca amasarañü tato. Aurrianca ito apache carrticurü ümoti naqui uiche ane manu nomünantü. Nanaiña arrüna sane bien urria. Uirri caüma tusio que champü napipüinate au arrümanu sane. ¹²Champürrtü rraconomoca aucutanu auqui nacarri maniqui uiche ane manu nomünantü, ni auqui nacarrümapü bama ümoche manu nomünantü. Rraconomoca nauqui puerurrü apitusianca arrüna tarucu suisua aume. ¹³Isane pasabo. Uirri arucu tato suiñemo caüma. Pero manrrü tarucu suipuçünuncu uiti Tito, itopiqui arrti iñataiti tato auna auqui tanu aubesaqui aübu nipuçünuncurri aucuata, itopiqui aboi tacürusu nisuchequirri. ¹⁴Nantarrai surapoi isucarüti que bien urria nausüboriqui. Pero caüma chauqui tapitusiancata isucarüti que ñemanauntu arrümanu nisura ümoti, tacana nantarrai surapoi arrüna ñemanauntu. ¹⁵Caüma manrrü naucua ümoti, itopiqui bien aquionotiyü iyo arrümanu napacoconauncu ümoti. Apasuquiucati nurria aübu napanauncu ümoti. ¹⁶Ipuçünunca ui arrüna sane. Tüpuerurrü ñoncatü nurria aume.

Causane nauqui urria numacumanaca

8

¹Caüma suraboi ausucarü, bama masaruquитай, arrüna causane ui bama icocoromati Jesús au Macedonia ui ñacunusüancacarri Tuparrü



(2 Co. 8.1)

ümoma: ²Ane tarucu macocotorrü ümoma ui manu nitaquisürücürüma. Pero champü nümoche uimia. Pucünüñamantai y macumananama aübu nanaiña nausasürüma, panaca poberrüma. ³Arrüñü tusio nurria iñemo. Arrüma macumananama chama, manrrü pünanaqui arrüna puerurrüma, y auqui noñemarrümantoe. ⁴Ñanquitioma nurria somopünanaqui nauqui puerurrüma ito ayurama ümo bama icocoromati Jesús au manu cürü Judea. ⁵Isamutema manrrü urria pünanaqui arrüna supacüpuca. Macumananama monirri itopiqui macoconaurrüma ümoti Tuparrü. Itorrimianamacü ümoti Tuparrü y suiñemo ito ui suisua ümoma.

⁶Sane nauquiche icüpucati Tito tanu, nauqui atrabacati pario abarrüpecu ümo arrüna sane. Anancati tücañe abarrüpecu nauqui comensabo uiti arrüna macumanatarrü. Caüma tiene que atacünucuti aübu manu trabacorrü, sane nauqui urria napaserebiqui ümo bama poberrü au Judea, bama cuasürü aume. ⁷Arraño ane aruqui nanaiñantai abüriacabo: Amoncatü nurria ümoti Tuparrü, apipiaca apanita uiti, tusio nurria aume, urria napaserebiqui ümoti y tarucu suisua aume. Sane nauquiche apiña nurria, nauqui puerurrü apacumana chama ui nicuarrüma aume bama poberrü.

⁸Champürttö rracüpuca aume. Pero irranca suraboi ausucarü arrüna tarucu nirrancarrüma ayurama bama maquiataca auqui manu cürü Macedonia. Uirri caüma manrrü arucu aume. Puerurrü apitusianca que ñemanauncurratoe isuasürüca aume. ⁹Arraño tusio aume arrüna tarucu nucua ümoti Cristo.

Artri tarucu nirricucurrti, pero isamunutiýü pobrerriatai utacu. Sane nauqui rricurrtü oñü au narrtartri Tuparrü ui manu nipoberequirrti utacu.

¹⁰Rracuansomocona baeta aume. Canapae urria aume apacumana tacana bama maquiataca, itopiqui aucutanu arraño chaquui tapiñahübuta monirri. Arraño tapasürüca aucutanu apapensa ümo arrüna naurrianca apacumana. ¹¹Sane nauquiche caüma tari süsiotüqui nurria narucurrtü aume aboiyapatoe, tacana aucutanu numo aübo apapensaca apacumana. Apacumana caüma isiu naca arrüna puerurrtü año. ¹²Itopiqui arrtü bacheca aübu nanaiña nurrianca, artri Bae Tuparrü yasutiuti numacumanata, itopiqui artri tusio ümoti arrüna nisubaiqui na ane oemo. ¹³Arrüna napacumanata ümoma champürtrü nauqui arraño caüma autaqisürüca. Pero arraño ane manrrü aboi pünanaqui bama pobrerri au manu cürü Judea. ¹⁴Sane nauquiche urria, arrtü apayuraca ümo bama taquisürü. Repente ane nauche ñana arraño autaqisürüca, y arrüma ane ümoma aübuca ayurama tato aume, tacana arrüna napayuraca ümoma caüma. Sane nauqui chepatai nusaca. ¹⁵Ane te corobo icütüpü bama israelitarri numo torrio utuburiboma eana manu rronse:

Artri naqui basuruti chama, chüsobüraopü ümoti.

Tapü artri naqui basuru chimiantai, ñatai ümoti.

Artri Tito ichepe bama icumpeñeruturrti

¹⁶Chapie ümoti Tuparrü, itopiqui uiti ane manu ñapensacaboti Tito, isiatai tacana arrüñü. ¹⁷Sumucana somü ümoti na aeroti tanu aubesa. Urria ümoti subura. Itopiqui artri tarucapae nrrancartri ayurati aume, sane nauquiche süroti tanu auqui noñemartriatoe.

¹⁸Ichepeti Tito icüpucati naqui quiatarri usaruqui, naqui bien urria yaserebiquirrti aübu nurartri Tuparrü. Arrübama icocoromati Jesús oncomatü ümoti au nanaiñantai. ¹⁹Tonenti naqui tacümanauncunu ui bama icocoromati Jesús, nauqui aürotitü suichepe, arrtü somecatü sopitorrimia arrüna macumanatarri. Ui arrüna sane ane manrrü manauncurrtü ümoti Tuparrü, y tusio arrüna nurrianca bayura ümo maquiataca. ²⁰Sane caüma champüti naqui mapensara que supacusüpüca monirri, arrtü sopiquiata. ²¹Irranca isamune arrüna urria au narrtartri Señor y au narra bama ito macirrtianuca.

²²Ichepe bama torri sopiciüpucati naqui quiatarri usaruqui. Tücoi yatrabacacartri suichepe, y sumarrai que bien arucu ümoti yaserebiquirrti ümoti Tuparrü. Y caüma manrrü arucu ümoti, itopiqui bien oncotitü aume. Arrtü ñataimia tanu aubesa, apasusiusuma nurria. ²³Artri Tito baserebioti ümoti Tuparrü autacu ichepeñü. Arrübama maquiataca süromatü au nüri bama icocoromati Jesús auquina. Uimia ito ane manauncurrtü ümoti Cristo. ²⁴Aptusianca isucarüma arrüna ñemanauncurratoe nicuarrüma aume, itopiqui chauqui tüsurapoi isucarüma arrüna urria aboi. Arrüna nicuarrüma aume tiene que atusi caüma ümo namanaiña bama icocoromati Jesús.

9 ¹Champü nümoche rraconomonacañü aume icütüpü arrüna macumanatarrü ümo bama icocoromati Jesús au Jerusalén. ²Chauqui tütusiatai iñemo ta aurrianca apayura. Chauqui tirranitaca abapü ümo bama au manu cürrü Macedonia. Sucanañü sane ümoma: “Tütane taman añorrü ñahübucurrüma monirri bama usaruquитайqui au manu cürrü Grecia”. Arrüma caüma arucu nurria ümoma aboi. ³Umo te icüpuruma conto tanu bama usaruquитайqui, nauqui anunecama y anibamoma aume, tapü mameso arrüna naurrianca apacumana, y nauqui ñemanauntu ito arrüna tûsurapoi naubuenucu isucarü bama au Macedonia. ⁴Icausanempü caüma arrtü yeca tanu aübu bama auqui Macedonia, y chûsumarrtaipü arrümanu ahüburu monirri aboi ümo manu macumanatarrü! ¿Aensapü chisûsocapü? ¡Y arraño ito aucûsocapü nurria! ⁵Sane nauquiche ñapensa icüpuruma primeru rropünanaquiñü bama masaruquитайqui tanu aubesa, nauqui acomorabo nurria uimia manu macumanatarrü. Ui nisubaiqui manu monirri tiene que atusi que arraño champürrtü amocütünaunca aumeampatoe.

**Torrio oemo uiti Tuparrü
nauqui puerurrü macumana**

⁶Apaquionsaño iyo arrüna manitacarrü: “Arrti naqui manati cütü chimiantai, chimiantaito cosechaboti. Tapü arrti naqui manati cütü chama, chama ito cosechaboti”. ⁷Apacumana taiquianati taman. Pero tari auquitiatoe arrüna nirrancarrti acumanati. Tapü pesabo aume napacumanata. Tapü apacumanaca, arrtü medio chaurriancapü. Itopiqui arrti Tuparrü pucünuñati icuatati naqui macumanana aübu nipucünuncurrti. ⁸Y arrti puerurrü acumanati aume manrrü chama pünanaqui arrüna tütorrio aboi, nauqui aiñanai aumeampatoe, y tacane puerurrü ito apacumana ümo bama maquitaca. ⁹Ane corobo icütüpüti naqui macumana sane:

Arrti bacheboti chama ümo bama poberrü.

Champü nitacüru nibuenucurrti aübuma.

¹⁰Arrti Tuparrü bacheboti oemo niyomanca arrüba sürobo cütü, y bachebotito uñububuribo. Arrti macumananati amenarribo. Arrtü apacumanaca, abaca tacanarrtü apancütuca. Tiene que cosechabo año ñana. Arrümanu cosecharrü, tone arrüna urria apisamute. ¹¹Uiti Tuparrü caüma aucurusüca, nauqui puerurrü siusürü apacumana ümoti quiatarrrü. Uirri caüma aboma bama sürümanama machampiencanama ümoti Tuparrü itopiqui arrüna macumanatarrü aboi, arrüna tiene que sopitorrimia ümoma. ¹²Ui arrüna napacumanata ümoma tiene que atacüru pario nitaquisürücurrüma. Urria arrüna sane. Pero urria ito arrüna ñachampienacarrüma bama sürümanama ümoti Tuparrü. ¹³Arrtü apiñatai nurria arrüna napacumanaca, arrübama icocoromati Jesús au Jerusalén iñanaunumati Tuparrü, itopiqui arrtaimia que arraño apicocota nurria arrüna urria manitacarrü icütüpüti Cristo. Iñanaunumati itopiqui arrüna apacumanaca chama ümoma aübu naupucünuncu. ¹⁴Meaboma caüma autacu ümoti Tuparrü,

y aucuasürüca ümoma, itopiqui arrtaimia arrüna tarucu nibuenucurrti Tuparrü aume. ¹⁵Machampiencana ümoti Bae Tuparrü itobo arrüna yarusürürrü ñacumanatarrti oemo.

Nüriacarrti Pablo, naqui apóstol

10 ¹Rranitana baeta ausucarü iñemoantoe. Namatü que arrüñü ichimiancacañü arrtü yaca abarrüpecu, pero arrtü yaca iche amopünanaqui itusiancata nurria nisüriaca. Apasamu nurria iñemo au nürirrti Cristo, naqui buenurrti usaübu y ucuasürüca ümoti. Rranquiquia amopünanaqui: Apasiusu nisura. ²Arrtü yeca tanu yasaraño, chirrancapü nauqui ane nümoche itusianca nisüriaca y nibrutucu. Itopiqui chirrucapü ñünana bama namatü: “Artri Pablo iñatati nisüboriquirrti tacanati cualquierarrü icuqui nantai cürü”. ³Ñemanauntu arrüñü ñoñünrrüñüantai, pero arrüna nirrahiqui champürttü tacana yahiquirrimia macrirrtianuca icu na cürü. ⁴Champürttü rrahiquia ui nicomerrüma bama masortaboca icu na cürü. Arrüna nirrahiqui ui nicusüurrti Tuparrü. Tone tacana nisome. Uirri iñarrimiacata arrüba churriampü manunecatata. ⁵Tacürusu ito sobi nipucünuncurrüma bama mañentonaunca, bama uiche chichebopü atusi nürirrti Tuparrü. Sobi caüma macoconaunrrüma ümoti Cristo bama macrirrtianuca aübu nanaiña ñapensacarrüma. ⁶Arrtü tusio nurria suiñemo que arrañ apacoconaunca tatito ümo nurartri Tuparrü, auqui caüma soboi supache carrticurü ümo bama chümacoconaumpü.

⁷Amasasai arrüna chauqui tütusio nurria. Artri naqui ñentonaunrrü aübu nürirrti Cristo, tapü tacürusu ñaquiioncorrti iyoñü, itopiqui arrüñü ito icococati Cristo, tacanati. ⁸Arrtü irranca, puerurü suraboi arrüna tarucu nisüriaca arrüna torrio iñemo uiti Tuparrü. Puerurü itusianca pario niñentonauncu, arrtü irrancapü, y champü nümoche nisüso. Pero arrüna nisüriaca torrio iñemo nauqui rrayura aume, champürttü nauqui ane causane sobi aume. ⁹Itopiqui chirrancapü aupirruca oboi ba nirraconomoso tanu aume. ¹⁰Aboma bama namatü sane iñemo: “Maconomonoti Pablo aübu tarucu nüriacartri, pero arrtü anati uyarrüpecu chüriabucati. Chütusiopü ümoti isane urapoboiboti”. ¹¹Suraboira ümo bama sane ñapensacarrüma: Arrtü yeca tanu aubesa isamute bien isiu nirraconomoso. Itusiancata nurria nisüriaca.

¹²Arrüñü irruca ichepecanañü tacana bama omirriantai ñanitacarrüma itacumantoe, itopiqui arrüma au ñaquiioncorrüma tarucapae ñapanauncurrüma. Abu sonsorrüma, itopiqui arrüma ichepecatama ñapanauncurrüma aübumantoe. ¹³Tapü arrüñü champürttü tarucapae nirranitaca ichacuñüantoe. Pero ñemanauntu artri Tuparrü chebo uiti iñemo nauqui puerurü iñanai hasta taha abarrüpecu aübu na urria manitacarrü. Arrüna sane nirratrabacaca tone arrüna uiche rrameriraca arrüna niyaserebiqui ümoti Tuparrü. ¹⁴Sane nauquiche champürttü tarucapae nirranitaca arrüna sane, itopiqui ñemanauncurratoe isusürüca iñanai taha aubesa aübu na urria manitacarrü icütüpüti Cristo. ¹⁵Champürttü vanurriñü aübu yatrabacaca maquiataca,

arrüna isamutema abarrüpecu. Pero yarrüperaca nauqui manrrü apicococati Cristo. Auqui caüma puerurrü rratrabaca manrrü abarrüpecu. Arraño nirratrabacasa año. ¹⁶Auqui caüma puerurrü yerotito manrrü tahiqui, nauqui suraboi arrüna urria manitacarrü auna cauta champüti tiyebotü anuneca. Sane tapü anati naqui nanti que arrüñü vanurrüñü aübu yatrabacacarrti quiatarrü.

¹⁷Nantü sane icu Nicorrorrü: “Arrti naqui rranrti apucünuti icuata niyachücoiti, mejor tari pucünüñati icuata arrüna isamutenti Señor”. ¹⁸Itopiqui arrti naqui manitana urria itacutiatoe chütusiopü arrtü ñemanauncurratoe urrianti. Tapü arrti naqui urria ümoti ñanitacarrti Tuparrü, tonenti ñemanauncurratoe urrianti.

Arrti Pablo ichepe bama apostolerrü mañapanca

11 ¹Rranitana baeta aume tacanati locorrü. Apasamu nurria iñemo, tapü ünantü aume nirranitaca ichacüñüantoe. ²Itopiqui arrüñü tarucu nirracuiraca autacu, tacane ito arrti Tuparrü tarucu yacuiracarrti autacu. Ichepecacaño tacana taman cupiquirri, arrüna prometebo sobi ümoti maniqui taman ñoñünrrü, nauqui apoti aübu. Arrümaniqui ñoñünrrü tonenti Cristo. Irranca te nauqui abaca ichepeti aübu urria nausüboriqui, champüti quiatarrü cuasürü aume manrrü pünanaquiti. ³Apaquionsaño iyo manu paürrü Eva tücañe. Arrti choborese encañaoti ümo. Sane ito irrucatai autacu, tapü itachemacanatito año, nauqui tapü apicocotaiqui arrüna ñemanauntu manitacarrü icütüpüti Cristo. ⁴Ta arraño chebatai aboi arrtü cuati taman aübu quiatarrü manunecatarrü icütüpüti Jesús, pero ta chisiupü tacana arrüna surapoi ausucarü. ¿Causanempito apasutiu quiatarrü espíritu, arrüna chisiupü nacarrti Espíritu Santo, naqui apasuquiucati primero? Apicocotatai arrtü urapويمia ausucarü quiatarrü manitacarrü, arrüna chisiupü tacana arrüna amoncoi sobi. ¿Causane chapicocotapito nisura?

⁵Acamanu abarrüpecu aboma bama maquiataca apostolerrü, napaquionco ane manrrü ñapanaucurrüma. Abu arrüñü isiatai nirrapanauncu tacana arrüma. ⁶Panaca medio chipiacapü nurria rranita, pero manrrü tusio iñemo pünanaquimia. Nantarrai itusiancata ausucarü arrüna sane.

⁷¿O taqui churriampü arrüna chirracobrañaopü aucutanu, nauquiche surapoi ausucarü arrüna urria manitacarrü? Ñemanauntu, itaquisünüancacañi, pero isamute sane autacu, nauqui urria nabaca. ⁸Nauquiche anancañü tanu abarrüpecu yaserebiquia aume, yasutiu monirri mecuqui bama icocoromati Jesús auqui quiatarrü narücüquirri. Arrüma bapacarama chama iñemo, nauqui puerurrü yaserebi aume. ⁹Numo champü isane iñemo, chirranquiquiapü amopünanaqui. Pero arrübama masaruquitaiqui auqui Macedonia bacüpuruma iñemo arrüna nirrantümo. Sane isamute aucutanu. Sane ito irranca isamune caümainqui, tapü ane nümoche apayura iñemo. ¹⁰Arrüna sane tone ipucünuncubu. Suraboira nurria au nürirrti Cristo y au nüri arrüna ñemanauntu: Arrüna sane nipucünucu chüpuerurrüpü amameso au nanaiña

cürri Grecia. ¹¹¿Causane sane sobi? Acasopü itopiqui arrüna chaucuasürücapü iñemo? No, arrti Bae Tuparrü tusio nurria ümoti arrüna tarucu naucua iñemo.

¹²Pero chüpuerurrürito yasuriu naumoni ñana itopiqui bama namatü que apostolerrüma, nauqui tapü namatü caüma que isiatai niyaca tacana arrüma. ¹³Arrüma champürrtü apostolerrüma. Itopiqui matachemacanama ümo genterrü. Itusiancanamacü tacana apostolerrü ümoti Cristo, abu ñapanturrüma. ¹⁴Tapü aucütobüca ui arrüna sane. Arrtiatöe choborese itusiancanatüyü isucarü genterrü tacana nacarrti taman ángel esaquiti Tuparrü, abu ñapanturrü. ¹⁵Sane nauquiche chisütöbücapü, arrtü isamutema isiatai bama baserebio ümoti. Mapañama aserebimia ümoti Tuparrü. Pero arrüma yasutiuma ñana carrticurrü, itopiqui arrüna churriampü isamutema.

Nitaquisürücürri apóstol Pablo

¹⁶Sucanañü tatito aume: Tapü apapensaca que locorrüñü. Pero arrtü sane napapensaca, tapü ane nümöche aboi. Irranca te rrapari baeta tacanati locorrü, nauqui puerurrü ñonquisio pario nivianucu. ¹⁷Arrüna sane nirranitaca champürrtü uiti Señor, ta rranitaca ichacuñüantöe aübu nivianucu tacanati locorrü. ¹⁸Aboma sürümanama bama manitana aübu nivianucurrüma. Sane nauquiche arrüñü ito rranitana baeta sane. ¹⁹Arraño napaquionco que urriampae napapanauncu. iSane nauquiche urriantai aume ñanitacarrti cualquier locorrü! ²⁰Chebatai aboi arrtü bacüpuruma aume, encañaoma aume y itachemacanama ito año; iñanamacü tacana yüriaburrü aume, y bacheboma ausu. ²¹Pero arrüñü champürrtü isamute sane. ¿Aensapü churriampü arrüna?

Pero rranitana baeta tacanati locorrü: Arrümanuma mañapanca apostolerrü ane arrüna uiche vanurrüma. Bueno, arrüñü ito ane uiche ivianu. ²²¿Arrüma ipiacama anitama hebreo? Arrüñü isiatai. ¿Arrüma israelitarrüma? Arrüñü isiataito. ¿Arrüma eanaqui nesarrti familiarrü Abraham? Arrüñü isiatai.

²³Apaquionsaño que rranitacatai, pero amonsoi nisura. ¿Arrüma namatü que baserebioma ümoti Cristo? Pero arrüñü manrrü niyaserebiqui ümoti. Manrrü tarucu nirratrabacaca ümoti. Manrrü anancañü au preso pünanaquimia, manrrü bacheboma chacuñü. Nantarrtai anancañü au peligrorrü nauqui ison. ²⁴Cinco veserrü carrticaboñü ui bama israelitarrü aübu manu carrticurrü treinta y nueve azoterrü yachequirrimia ichacuñü. ²⁵Trerrü veserrü ipubairomañü bama rromanorrü. Au manu taman nanenese yarurumañü oboi canca. Trerrü veserrü anancañü au taman barco arrüna iñarrio isu turrü y ubacara. Anancañü eana turrü rratuca taman sapese y taman tobirri, na iñanai tato isiu nabeurrü. ²⁶Nantarrtai viajaboñü. Yaca au peligrorrü ui arrüba sapoco ubataso ui turrü, y aboma macusüptüca yusiu cutubiüca. Aboma isiuñü bama israelitarrü y bama ito chütipü israelitarrü. Ubau puebluca ane ito peligrorrü iñemo y eana narubaitu rroense y isu narubaitu turrü. Ane ito peligrorrü iñemo ui bama namatü que ta isaruquitaiquimia, abu ñapanturrüma. ²⁷Anancañü bien yatacheca, ichaquisürüca y ane nauche chirranucapü. Ichaquisürüca ui nistürüpü y ui nichosü. Ane nauche

champü isane rrutuburiboñü. Ane nauche ichaquisürüca ui rrimianene, itopiqui champü nisahibi ni nirrüburrüpü. ²⁸Y todaviarrü tarucu penarrü sobi iyo bama icocoromati Jesús hasta caümainqui. ²⁹Arrtü anati naqui chipiacatipü nurria aicocorotiti Cristo, arrüñü ñonquisio nurria tacanarrtü arrüñü. Arrtü ññatama macocotorrü ümoti taman, tarucu nichübori, irranca rrayura ümoti.

³⁰Arrtü tarucu nivianucu ausucarü, mejor ivianuna aübu arrüba nichaquisürücü. ³¹Arrti Tuparrü naqui Yaütoti Señor Jesucristo tusio ümoti, ta chirrapancapü, ñemanauntu nurria nisura. Tapü tacürusu numanauncu ümoti. ³²Numo anancañü au manu pueblurrü Damasco, anancati maniqui comandanterrü uiti yüriaburrü Aretas. Arrti maniqui comendanterrü bacüpuruti ümo masortaboca ubabeu nituru pueblurrü, nauqui acuirama, nauqui aiñenomañü. ³³Pero ane manu metanarrü au narripo pueblurrü. Auqui manu ññemecanamañü acü apüqui tucumarrü au noconorrü. Sane nauquiche yesübuca pünanaquimia auqui manu pueblurrü.

Asaratitü Pablo auqui quiatarrü narrtarrti

12 ¹Arrüna niranitaca ichacuñüantoe sürotiqui, panaca champürrtü urria nurria arrüna sane. Pero irranca suraboi ausucarü arrümanu numo yasacatü auqui quiatarrü niyasata, y arrümanu itusiancanatiyü Señor isucarüñü. ²⁻³Tütabe catorce añoca arrti Tuparrü iquianatiñü ape au manu tercer napese au manu tiemporrü, nauquiche ticococati Cristo. Pero chütüsüpü ññemo, arrtü anancañü taha aübu nanaiña nisütüpü, o arrtü aübu niyesa espirituatai. Arrtiatai Tuparrü tusio ümoti. Pero tusio nurria ññemo que anancañü taha au manu paraíso. ⁴Taha ññoncoi arrüna chüpuerurrüpü rranitane auqui ññanitacarrüma mañoñünca, y ane ito bacüpucurrü ññemo, tapü surapoi. ⁵Ui arrüna sane puerurrüpü ane nivianucu pario. Pero champü isane nivianucu ui arrüna yacatü, más bien ipucünuncatai yucuata arrüba nichaquisürücü. ⁶Arrtü nampü irranca rranita ññemoantoe, chüpuerurrüpü rranitai, itopiqui ññemanauntu arrüna surapoipü. Pero chisamutempü sane, tapü anati mapensara que arrüñü ane manrrü nivialequi pünanaqui arrüna arrtaiti au nisüboriqui. ⁷Arrümanu quiatarrü niyasata champü tacanache. Sane nauquiche arrti Tuparrü bacheboti ichaquisürücüboñü, nauqui tapü isamucañü ññentonaunrrüñü. Yaca aübu arrüna norrocorrü uiti taman choborese. Chebo uiti Tuparrü, nauqui aheti ichaquisürücüboñü. ⁸Chauqui tütabe trerrü niranquiqui pünanaquiti Señor, nauqui acurati ññemo. ⁹Pero arrti nanti ññemo sane: “Ññatai aemo nibuenucu. Itopiqui ui arrüna chacüsücapü manrrü tusio nisüsü au nasüboriqui”. Sane nurarrti ññemo. Sane nauquiche caüma urriantai ññemo arrüna chisüsücapü. Ipuçünuncatai icuata, itopiqui uirri caüma tusio nicüsürrti Cristo au nisüboriqui. ¹⁰Sane nauquiche urriantai ññemo nichaquisürücü auqui nacarrti Cristo. Unumañü. Champü isane ññemo. Tüboricoma ññemo. Cuantio chütamampatai ññemo. Pero nanaiña urria ññemo auqui nacarrti. Itopiqui arrtü chisüsücapü, auqui caüma ññemanauncurratoe isüsüca uiti.

Mapensarati Pablo iyo bama Corintios

¹¹Rranitaca one tacanati locorrü, itopiqui inëmoantoe arrüna nirranitaca. Abu aboi isamute sane. Itopiqui arrañoöpü tiene que apanita nurria ichacuñü. Ñemanauntu te, arrüñü champü isane niyaca. Pero ta isiatat niyaca tacana bama maquiataca apostolerrü, bama ensümunuma aboi. ¹²Bien ñasamunaunca abaiübu. Itusiancata ausucarü ta ñemanauncurratoe apóstol ñü. Ñasamuca milagrorrü y señarrü taha abarrüpecu. ¹³Arraño isiatat naucua inëmo tacana bama icocoromati Jesús au piquiataca puebluca. Champü nünantü sobi aume. Tamantai arrüna quiatarrü niyachüicoi abaübu: Chirranquiquiapü naumoni amopünanaqui. ¡Tapü ünantü aume arrüna sane!

¹⁴Chauqui nisobori, nauqui yero tanu aubesa yasaraño. Ui na caüma tabe trerrü ññame tanu. Arrtü inñatai, sane tatito sobi: Chirracobracapü amopünanaqui. Chirrancapü ümo naumoni, irranca nauqui isuasürü aume, aübu nanaiña nabausasü. Arrti taman ñoñünrrü bapacarati itoboti aütorrti, y itobo arrüna utuburiboti. Champürtrü bapacarati ñaüma itobo utuburiboti yaütoti. Arrüñü tacanati aubaü. ¹⁵Itorrimiata nanaiña arrüna ane sobi autacu, hasta arrüna nisüboriqui, nauqui rrayura aume. ¿Carü arraño, aensapü chisuasürücapü aume, itopiqui arrüna naucua inëmo?

¹⁶Así que bien tütusio aume, champürtrü apacarrtaca ichopiquiñü. Rrepente anati naqui nanti: “Artri Pablo ipiacati nurria encañati oemo”. ¹⁷Cautapü tirrecañaca aume? Ni arrübamapü icüpuçama tanu encañaoma aume.

¹⁸Nauquiche icüpuçati Tito ichepeti maniqui quiatarrü saruqui, ¿acasopü encañaoma aume? No artri Tito y arrüñü chepatai supapensaca y supachüicoi.

¹⁹De repente arraño apapensaca que rraconomoca nanaiña arrüna sane nauqui rranitaca ichacuñüantoe. No chüsanempü. Rranitaca au nürirrti Cristo isucarüti Tuparrü. Rranitaca sane, nauqui rrayura aume, masaruquitaqui, bama cuasürü inëmo. ²⁰Artrü yeca tanu yasaraño, irrucatai, itopiqui rrepente autabüca sobi aübu arrüna churriampü inëmo. Y sane ito arraño artrü ichabüca aboi aübu arrüna chüsamiamanapü aume. Ane penarrü sobi autabü aübu naburatoquiqui aumeampatoe y abubatio nenarrirrti quiatarrü, autüboriquiatai y cadati taman mapensarati itacutiatoe, y apanitaca churriampü ümoti quiatarrü y vanurrü año y champü nurrianturrü abarrüpecu. ²¹Sane nauquiche irruca, artrü yeca tanu tatito yasaraño. Ñonquisio nisüso autopiqui isucarüti Tuparrü. Chirrancapü isuche tatito ui bama sürümanama isamutema nomünantü tücañe, y chiñorronconomapüci, bama bavivico tacana numuquianca tücañe y isamutema arrüna chomirriampü.

Ñacuansomocorrti Pablo aübu ñaquioncorrti ümoma

13 ¹Ui arrüna caüma tütabe trerrü niyüci tanu aubesa. Artrü ane chürüri tiene que atusi isane pasabo ui torrü o trerrü tercticurrü, bama chepatai nurarrüma. Sane nantü icu Nicororrü. ²Suraboira baeta isucarü bama aboma abarrüpecu, bama isamutema tücañe nomünantü,

y isucarü ito bama maquiataca: Arrtü yeca tanu tatito, tiene que yache carrticurrü nurria aume. Chauqui tisurapoi arrüna sane numo anancañü abarrüpecu aucutanu. ³Arraño aurrianca atusi aume arrtü ñemanauncurratoe manitanati Cristo ichuruquiñü. Arrti tiene que aitusiancati nicusüurrü ameana, arrüna champü tacanache. Arrti chübirrubutipü amünana. Auqui caüma atusi aume. ⁴Numo anancati apü curusürrü chücusiurutipü, coiñoti. Pero süboricoti tato ui nicusüurrü Tuparrü. Isiatai arrüñü, chisusücapü caüma tacanati, itopiqui yaca ichepeti. Pero arraño tiene que amasarai ito nicusüurrü Tuparrü au nisüboriqui tacana ito au nisüboriquirrti Cristo.

⁵Apapensasio nurria ümo nausüboriqui, na atusi aume, arrtü ñemanauncurratoe apicococati Jesús. Tiene que atusi ta anati Cristo au nabausasü. Si no apapancatai apicocoroti. ⁶Pero ñoncatü aume, atusi aume que arrüñü bien icococati Cristo, champürrtü rrapanca. ⁷Rreanca ümoti Bae Tuparrü autacu, nauqui tapü apisamute arrüba chomirriampü. Rreanca sane champürrtü nauqui itusianca isucarü genterrü arrüna urriampae nirratabacaca, ta nauqui ñemanauncurratoe apisamute arrüna urria. Champü nümoche sobi, arrtü ñapanrrüñü au ñaquiönco genterrü. ⁸Itopiqui chüpuerurrüpü suraboi arrüna chüñemanauntupü. Tiene que suraboi arrüna ñemanauntu manitacarrü. ⁹Ipuçünunca arrtü champü isane niyaca icu na cürrü, y arraño arucu nurria aume. Sane nauquiche rreanca caüma nauqui aucoñoco tato nausüboriqui. ¹⁰Rraconomoca tanu aume nanaiña arrüna sane, nauqui tapü tarucapae nirracuansomoco aume, arrtü iñatai tanu abarrüpecu. Itopiqui arrüna nisüriaca torrio iñemo uiti Tuparrü es nauqui rrayura aume, champürrtü nauqui iñamesoconañö.

¹¹Taiquiana urria nabaca tanu, masaruquитайqui. Apiña nurria nauqui apicoñoco nausüboriqui. Apapensasio nurria arrüba nirracuansomococo aume. Tari chepatai napapensaca, y tari urria nausüboriqui abaübuatoe. Tari anati Tuparrü anchepe, itopiqui ucuasürüca ümoti, y uiti urria nusaca. ¹²Apanqui nurria aumeampatoe aübu napatañumequi aumeampatoe au nürirrti Tuparrü. ¹³Namanaiña bama masaruquитайqui auna ñaquiöncorrüma tanu aume.

¹⁴Tari icunusüancanati año Señor Jesucristo. Tapü tacürusu naucua ümoti Bae Tuparrü. Tari nantarrü yayurarati Espíritu Santo aume.